

七十二家集

梁昭明太子集卷之三

梁昭明太子蕭統著

啓

謝勅賚地圖啓

漢氏輿地形茲未擬晉世方丈比此非妙匹之
長樂惟畫古賢儔之未央止圖將帥未有洞該
八藪混觀六合域中天外指掌可求地角河源
戶庭不出豈問千秋自識烏桓之地脫逢壯武
方著博物之書

謝勅賚水犀如意啓

臣統啓應勅左右伯佛掌奉宣勅旨垂賚水犀如意一柄式是道義所須白玉照彩方斯非賚珊瑚挺質匹此未珍雕削旣成先被庸薄如蒙漢帝之簪似獲趙堯之印謹仰承威神陳諸講席方使歡喜羅漢懷棄鉢之嗟王式碩儒忻驪駒之舞熊飾寶刀子栢惡其大賚犛牛輕拂張敞慙其舊儀殊恩特降伏深荷躍不任下情謹啓事以聞謹啓

謝勅賚制旨大涅槃經講疏啓

臣統啓後閣應勅木佛子奉宣勅旨垂賚制旨
大般涅槃經講疏一部十卷合目百一卷寒鄉
覩日未足稱竒採藥逢仙曾何譬喜臣伏以六
爻所明至邃窮於幾象四書所總施命止於域
中豈有牢籠因果辨斯寶域之教網羅真俗開
茲月滿之文方當道洽大千化均百億雲彌識
種雨遍身田豈復論唐帝龜書周王策府何待
刊寢孟津屏黜丘索甘露妙典先降殊恩揣已

循愚不勝慶荷不任頂戴之至謹奉啓

謝勅賚看講啓

臣統啓主書管萬安奉宣勅旨以臣今講竟曲
垂勞問伏以正言深奧總一群經均斗杓以命
四時等太陽而照萬國臣不涯庸淺輕敢奉宣
莫測天文徒觀玉府慙悚交并寢興無寘仰降
中使俯賚光臨榮荷殊慈靡知啓處不任下情
謹附啓事謝聞謹啓

謝勅叅解講啓

臣統啓主書周昂奉宣勅旨垂叅臣今解講伏
以至理希夷微言淵奧非所能鑽仰遂以無庸
叨茲宣釋將應讓齒反降教胃之恩允宜尚學
翻荷說經之詔竊以挾八威之策則神物莫干
服九丹之華則仙徒可役臣仰承皇威訓茲學
侶奉揚聖旨洞曉群儒鼓冶異師陶鈞久滯方
使惠施愿其短長公孫罷其堅白王生挫辯旣
盡神氣法開受屈永隱東峰中使曲臨彌光函

席仰戴殊慈不知啓處不任下情謹奉啓事謝
聞謹啓

謝勅賚制旨大集經講疏啓

臣統啓宣詔王慧寶奉宣勅旨垂賚制旨大集
經講疏二袞十六卷甘露入頂慧水灌心似闇
遇明如饑獲飽伏以非色非欲二界同坊匪文
匪理三詮雲集四辯言而未極八聲闡而莫窮
俯應天機垂茲聖作同真如而無盡與日月而
俱懸但觀寶春山獲珠大海臣實何能恒蒙誘
被張奏谷筆豈足陳心抗袖長言未伸歌舞不
任喜荷之至謹奉啓謝聞謹啓

東宮掘得慈覺寺鐘啓

竊以白亭舊室絕顯禎祥之氣闕里故堂暫聞
鍾石之響猶復存諸良史汗彼篆素豈如杏梁
遺飾廻成糾殿椒杼昔處仍構寶階啓鑿鐘於
殊里記靈文於福地雖魏廟出璽魯祠現璧固
以推茲孝感感惡此禎契將郭令鄙其開金羊田
陋其產玉豈直季武庭樹愧韓起之譽蜀相宅
基慙孝安之碣伏惟覽啓增思撫瑞深悲慟切
視奩哀喻封篋

十二月啓

太簇正月

伏以斗周天送玄英之故節東風拂地啓青
陽之芳辰梅花舒兩歲之褰柏葉汎三朶之酒
飄飄餘雪入簫管以成歌皎潔清冰對蟾光而
寫鏡敬想足下神游書帳性縱琴堂談叢發流
水之源筆陣引崩雲之勢昔時文會長思風月
之交今日言離末歎參商之隔但某執鞭賤品
耕鑿庸流沈形南畝之間滯迹東臯之上長懷

盛德聊吐愚衷謹憑黃耳之傳佇望白雲之信

夾鍾二月

伏以節應佳辰時登令月和風拂迥淑氣浮空
走野馬於桃源飛少女于李徑花明麗月光浮
寶氏之機鳥哢芳園韻響王喬之管敬想足下
優游泉石放曠煙霞尋五柳之先生琴尊雅興
謁孤松之君子鸞鳳騰翩成萬世之良規實百
年之令範但某蒔戶幽人蓬門下客三冬勤學
慕方朔之雄才萬卷常披習鄭玄之逸氣旣而

風塵頓隔仁智並乖非無衰侶之憂誠有離群
之恨謹伸數字用寫寸誠

姑洗三月

伏以景逼徂春時臨變節啼鶯出谷爭傳求友
之音翔藥飛林兢散佳人之屬爰游碧沼疑呈
遠道之書燕語雕梁狀對幽閨之語鶴帶雲而
成益遜籠大夫之松虹跨澗以成橋遠現美人
之影對茲節物寧不依然敬想足下聲馳海內
名播雲間持郭璞之毫鸞詞場月白吞羅含之

彩鳳辯囿日新其山北逸人墻東隱士龍門還
水望冠冕以何年鷁路頽風想簪纓於幾載旣
達語嘿且阻江湖聊寄八行之書代申千里之
契

中呂四月

節屆朱明晷鍾丹陸依依聳蓋俱臨帝女之桑
鬱鬱丹城並挂陶潛之柳梅風拂戶牖之內麥
氣擁宮闕之前敬想足下聲聞九臯詩成七步
涵蚌胎於學海卓爾超群蘊鵲抵于文山儼然

孤秀但其窮途異縣岐路他鄉非無阮籍之悲
誠有楊朱之泣每遇秋風振響鶉鷩子夏之衣
夜月流輝鵲繞將軍之樹旣垂連璧之契終隔
斷金之情中心藏之卑誠至矣今因去鴈聊寄
芻蕘如遇回鱗希垂玉翰

製賓五月

麥隴移秋桑律漸暮蓮花汎水豔如越女之頤
蘋葉漂風影亂秦臺之鏡炎風以之扇戶暑氣
于是盈樓凍雨洗梅樹之中火雲燒桂林之上

敬想足下追涼竹徑托蔭松間彈伯牙之素琴
酌嵇康之綠酒縱橫流水酩酊頽山實君子之
佳游乃王孫之雅事某沈疴漳浦卧病泉山頓
懷蠲幹之勞鎮抱相如之酷是知枯榮莫測生
死難量驗風燭之不停如水泡之易滅聊伸弊
札以代勞人幸觀芳詞希垂愈病

林鍾六月

三伏漸終九夏將謝螢蜚腐草允浮帳裏之書
蟬噪繁柯影入機中之鬢濯枝遷而滌溢芳樅

茂而發榮山土集而流金海水沸而漂爍敬想
是下藏形月府遁跡冰床披莊子之七篇逍遙
物外玩老聃之兩卷恍惚懷中但其白社狂人
青緇末學不從州縣之職聊立松篁之間時假
德以爲鄰或借書而取友三千年之獨鶴暫逐
雞群九萬里之孤鵬權潛燕侶旣非得意正可
忘言諸不具仲應俟面會

夷則七月

素商驚辰白藏屈節金風曉振偏傷征客之心

玉露夜凝直，
泫仙人之掌。
桂吐花于小山之上。
梨翻葉於大谷之中。
故知節物變衰，
草木搖落。
敬想足下時稱獨步，
世號無雙。
萬頃澄波，
黃叔度之器量。
千尋聳幹，
稽中散之楷模。
但某一介庸才，
三隅頑學。
懷經問道，
不遇披雲。
負笈尋師，
竿逢見日。
俛仰興歎，
形影自憐。
不知龍前，
不知龍後。
鸞鵬雖異，
風月是同。
幸矣擇交，
希垂影拂。

南呂八月

一歎分飛三秋限，
隔遐思盛德將何以伸。
白雲

斷而音信稀青山暝而江湖遠敬想足下羽儀
勝矐領裏嘉賓傾玉醅于風前弄瓊駒于月下
但某登山失路涉海迷津聞猿嘯而寸寸斷腸
聽鳥聲而雙雙下淚當以黃花笑冷白羽悲秋
既傳蘇子之書更汎陶公之酌聊因三鳥略敘
二難面會取書不能盡述或叨風念不黜灸臧

無射九月

宿昔親朋平生益友不謂窮通有分雲雨將乖
既深伐木之聲更問採葵之詠屬以重陽變敘

川
景窮秋霜抱樹而擁柯風拂林而下葉金堤
翠柳帶星采而均調紫塞蒼鴻追風光而結陣
敬想是下秀標東箭價重南金才過吞鳥之聲
德薄懷敏之智但某衡門賤士甕牖微生旣無
白馬之談且乏碧雞之辯歎分飛之有處嗟會
面以無期聊伸佈服之言用述併糧之志

應鍾十月

節屆玄靈鍾應陰律愁雲拂岫帶枯葉以飄空
翔氣浮川映危樓而疊迴胡風起截耳之凍飈

日興曝背之思敬想足下山岳鍾神星辰挺秀
潛明晦跡隱於朝市之間縱法化人不混鄉閭
之下某陋巷孤游穿墻自活終朝息轡若孔子
之爲貧竟日停炊如范生之在職牛衣當被畏
見王章犢鼻親操恐逢犬子雖此慙賤而不羞
貧絀服有時此言何述

黃鍾十一月

日往月來灰移火變暫垂語嘿頓隔秦吳旣傳
蘇李之書更共范張之志冷風盛而結鼻寒氣

切而凝唇虹入漢而藏形鶴臨橋而送語彤雲
垂四面之葉玉雪開六出之花敬想足下世號
冰壺時稱武庫命長袂而留客施大被以招賢
酌醇酒而攄切骨之寒溫獸炭而袂透心之冷
某攜戈日久荷戟年深揮白刃而萬定灰生引
虹旗而干決成敗還龍劍而却步月下開營進
鯨鼓而橫行雲前起陣徒勞斬斫豈用功勲諸
不具陳謹伸微意

大呂十二月

分手未遙翹心且積引領企踵朝夕不忘眷友
思仁行坐未捨旣屬嚴風極冷苦霧添寒冰堅
漢地之池雪積袁安之宅敬想是下棲神鶴駕
杳想龍門披玩之間願無捐德某種瓜賤士賣
餅貧生入爨竈以揚聲不逢蔡子駕鹽車而顯
跡罕遇孫陽徒懷叩角之心終想暴腮之患旣
爲久要聊吐短章紙盡墨窮何能懇露

梁昭明太子集卷之四

梁昭明太子蕭統著

序

文選序

式觀元始，眴覲玄風。冬穴夏巢之時，茹毛飲血之世。世質民淳，斯文未作。逮乎伏羲氏之王天下也，始畫八卦，造書契，以代結繩之政。由是文籍生焉。易曰：「觀乎天文，以察時變；觀乎人文，以化成天下。」文之時義遠矣哉！若夫樞輪爲大輅，

之始大輅寧有椎輪之質增冰爲積水所成積
水曾微增冰之稟何哉蓋踵其事而增華變其
本而加厲物既有之文亦宜然隨時變改難可
詳悉嘗試論之曰詩序云詩有六義焉一日風
二曰賦三曰比四曰興五日雅六曰頌至於今
之作者異乎古昔古詩之體今則全取賦名荀
宋表之於前賈馬繼之於末自茲以降源流寔
繁述邑居則有憑虛亡是之作戒畋遊則有長
楊羽獵之制若其紀一事詠一物風雲草木之

興魚蟲禽獸之流推而廣之不可勝載矣又楚人屈原含忠履潔君匪從流臣進逆耳深思遠慮遂放湘南耿介之意既傷壹鬱之懷靡愬臨淵有懷沙之志吟澤有憔悴之容騷人之文自茲而作詩者蓋志之所之也情動於中而形於言關雎麟趾正始之道著桑間濮上亡國之音表故風雅之道粲然可觀自炎漢中葉厥塗漸異退傳有在鄒之作降將著河梁之篇四言五言區以別矣又少則三字多則九言各體互興

分鑣並驅頌者所以游揚德業褒讚成功吉甫
有穆若之談季子有至矣之歎舒布爲詩旣言
如彼總成爲頌又亦若此次則箴興於補闕戒
出於彌匡論則析理精微銘則序事清潤美終
則誅發圖像則讚興又詔誥教令之流表奏牋
記之列書誓符檄之品弔祭悲哀之作答客指
事之制三言八字之文篇詞引序碑碣誌狀衆
制鋒起源流間出譬陶匏異器並爲入耳之娛
黼黻不同俱爲悅目之翫作者之致蓋云備矣

今豈撫餘閒居多暇日歷觀文囿泛覽辭林未
嘗不心遊目想移晷忘倦自姬漢以來耿焉悠
邈時更七代數逾千祀詞人才子則名溢於縹
緲飛文染翰則卷盈乎緗帙自非略其蕪穢集
其清英蓋欲蕪功太半難矣若夫姬公之籍孔
父之書與日月俱懸鬼神爭奧孝敬之准式人
倫之師友豈可重以芟夷加之剪截老莊之作
管孟之流蓋以立意爲宗不以能文爲本今之
所選又亦略諸若賢人之美詞忠臣之抗直謀

夫之話辯士之端水釋泉涌金相玉振所誦坐
徂丘議稷下仲連之却秦軍食其之下齊國留
侯之發八難曲逆之吐六奇蓋乃事美一時語
流千載概見墳籍旁出子史若斯之流又亦繁
博雖傳之簡牘而事異篇章今之所集亦所不
取至於記事之史繫年之書所以褒貶是非紀
別異同方之篇翰亦已不同若其讚論之綜緝
辭采序述之錯比文華事出於沈思義歸乎翰
藻故與夫篇釋雜而集之遠自周室迄於聖代

都爲三十卷名曰文選云爾凡次文之體各以彙聚詩賦體旣不一又以類分數分之中各以時代相次

陶靖節集序

夫自術自媒者士女之醜行不忤不求者明達
之用心是以聖人昭光賢人遁世其故何也含
德之至莫踰於親親已之切無重於身故道存
而身安道亡而身害處百齡之內居一世之中
倏忽比之白駒寄遇謂之逆旅宜乎與大塊而
盈虛隨中和而任放豈能戚戚勞於憂畏汲汲
役於人間齊謳趙女之娛八珍九鼎之食結駟
連騎之榮侈袂執圭之貴樂旣樂矣憂亦隨之

何倚伏之難量亦慶弔之相及智者賢人居之
甚薄冰思夫食土競之若洩尾閭玉之在山
以見珍而終破蘭之生谷雖無人而自芳故莊
周垂釣於濠伯成躬耕於野或貨海東之藥草
或紡江南之落毛譬彼鴛鴦雖豈競鳶鷂之肉猶
斯離縣寧勞文仲之牲至于子常寧喜之倫蘇
秦衛鞅之匹死之而不疑甘之而不悔主父偃
言生不五鼎食死則五鼎烹卒如其言豈不痛
哉又楚子觀周受折於孫滿霍侯驂乘禍起於

負芒饗餐之徒其流甚衆唐堯四海之主而有
汾陽之心子晉天下之儲而有洛濱之志輕之
若脫屣視之若鴻毛而况於他人乎是以至人
達士因以晦迹或懷璚而謁帝或被褐而負薪
鼓枻清潭棄機漢曲情不在於衆事寄衆事以
忘情者也有疑陶淵明詩篇篇有酒吾觀其意
不在酒亦寄酒爲迹者也其文章不群辭彩精
拔跌宕昭彰獨超衆類抑揚爽朗莫之與京橫
素波而傍流干青雲而直上語時事則指而可

想論懷抱則曠而且直加以貞志不休安道苦
節不以躬耕爲耻不以無財爲病自非大賢篤
志與道汚隆孰能如此乎余素愛其文不能釋
手尚想其德恨不同時故加搜校粗爲區目白
璧微瑕惟在閑情一賦揚雄所謂勸百而諷一
者卒無諷諫何足搖其筆端惜哉亡是可也并
粗點定其傳編之手錄嘗謂有能觀淵明之文
者馳競之情遣鄙吝之意祛貪夫可以庶懦夫
可以立豈止仁義可蹈抑乃爵祿可辭不必徇

游泰華遠求柱史此亦有珎於風教也

七

七契

奚斯逸士肥遁棄榮蓮峰於焉刻跡灌木是用
鹿形口不悅於五味心不娛於八聲鄙巢父之
稱哲笑蘇門之爲英鵠蓋龍旂初不關意鳳吹
鼉鼓終不屑情跨四海而擅美邁三古而振名
居山林而不返終無慮而無營於是辯博君子
詞若湧泉言踰却秦之魯辯超稷下之田欲抑
則大鵬垂翅欲抗則尺鷃冲天聞逸士之懷寶

乃拂衣而造焉駕兩騾之如手乘輕車之若流
爰自畿甸徑造山周俯瞻虹見俯眺雲浮鳴禽
聒耳零霧蔽眸唯一壑之爲阻無三逕之可求
於是披榛陟路援蘿踐嶸雖跋涉而不休覩逸
士之所託其爲居也寂焉而靡所聽瞑然而無
所瞻三春蔓戶八桂攢簷華門鳥宿圭竇狐潛
風來室搖霧下窻霑寔人跡之罕至逸士於此
而獨淹

君子曰蓋聞智士不希狷介仁者莫有迷邦傳

說終受殷爵呂望遂啓齊封余敬吐誠而畢慮
子能晉志而見從乎逸士曰鄙人固陋自潛幽
藪必枉話言敬聆金口

君子曰若夫夾鍾之節春景依遲碧樹初蘗綠
草含滋春臺之樂信矣熙熙於是百金之士萬
鍾之家招搖隆富徵集豪華駕紫駟之馬乘青
蓋之車出自高宇行無狹斜陶嘉月而結交遊
藉芳辰而宴朋友望宜春以隨肩入長楊以携
手金盤薦美藉之珍玉杯沉縹清之酒義曰和

神事非爽口於是娛樂未終畱光將夕飛觴引
滿奮袖舉白投轄安坐歡甚促席以會雕蟲之
質加有清談之客論同炙輠藻若凌雲戴憑不
能高其說相如不能擅其文無玄不折無細不
分擲簡玉振下筆蘭芬乃亦六郡莫擬非直三
蜀蔑聞屬虞泉氣晚朗月潛曜清卮未闌宵景
方照竒舞通作名謳斯召約綽妍姿婢媢宜笑
綺縠風吹珠璣星耀齊竿颺參差之響趙瑟奏
鏗鏘之妙茲亦遊讌之至娛子能偕此而爲樂

乎逸士曰輕蕩遊觀非予所耽得性行樂從好
山南

君子曰輔性和神實惟至味非直方今見重乃
亦自古攸貴不周之和調腸補胃雜以龍肝獾
炙豹舌猩唇劉氏之醢范公之鱗鴈出雲際鱗
來江岷蒲俎芬馥古聖所珍其酒則蒼梧九醞
中山千日取譬湛露擬之飴蜜百味交馳三雅
間出若其珍異則脩筵斯溢千品萬類不可詳
悉西母靈桃南楚萍實東陵之瓜北燕之栗湖

畔之柿江陰之橘張掖白柰怕陽黃黎河東洗
犬隴蜀蹲鴟並怡神其口窮美極滋加以伊公
調和易氏燔爨傳車渠之椀置青玉之案瑤俎
旣已麗音雕盤復爲美玩子能與予而享之乎
逸士曰其臍腸腐五味口瘳伊人素蓄無羨方
丈

君子曰千里之駒出自余吾伯樂所選伏波所
模通肩合相平腹應圖激電比速躡景競驅騰
黃弗敢擬駿赤兔莫與爭途異態踴蹙奇姿倚

信逸足驟友遊雲移駛形函遊華日不暇徒廼
飾金羈之昭晰加以玉鞍之輝煥連乾麗靡輕
蘇燦爛逸氣旣爲勝矚美飾重成壯觀蹄蹶紅
塵膺流絳汗風起龍驤灰聲鳥散自古迄今人
誰不玩逸士能就予而乘之乎逸士曰遊逸輕
佻策馬爭驅粵今樂靜豈能感娛

君子曰光形飾體莫過解衣冠鷄鷄之長纓者
曾雲之零霏琅玕珮言飾于背飄颻輕裾是
用曜軀方空之綬弱紈之蕉暑纔炙而已却風

未至而先搖旣唯照麗兼以輕鏘似朝霞之發
彩若夕景之舒光至夫杪秋旣謝寒緒中人則
輕狐稱美豐貂表珍斯乃赤也所以去象孟嘗
所以出秦步光之妙櫺具之華君子武備所用
禦邪標以珠玉飾以蓮花其任則百冶精銳利
擬秋霜豈止在身爲美服襲稱臧固乃龍躍於
襄水見氣於南昌幽通神化其妙難詳將與逸
士服之以相狎逸士曰紵絺避暑緼袍禦冬鮮
麗綺靡未之或從

君子曰寔有喬桐拙葉青葱結根善地擢幹華
蒿栖鳳曾山之側藏龍平陵之東拂靈靈之高
雲鼓捎殺之雄風岩亭萬仞寔造天中乃使匠
石運斤班輪琢鏘製起玄脩形踰綠綺與金石
而鏗鏘典絲竹而曼靡托北方之佳人命高樓
之杞氏間以巴隴才僮郢鄆妙妓騁獸爲之輟
馳飛禽爲之不徙加以荆和之飾照耀柘絲之
絃激揚三聲吐韻四結流唱辭高薰奏響溢芝
房竹來嶰谷律寫歸昌再鼓而玄鶴集九成而

儀鳳翔初音魚踊餘妙繞梁何止田文慨慷劉
靖心傷而已哉中山青曲若折而和揚美目以
流眄啓玉齒而安歌歌曰陽阿奏兮激楚流望
洛水兮有好仇縱輕櫂兮汎龍舟將與逸士陟
彼華堂憇諸閤館玉宇明華文階燦爛璇題昭
晰珠簾彪煥身託璚琚之筵目寓瓊華之玩且
以悅諸和性之樂豈非綺麗之觀哉逸士曰居
茲四郭寧辨五音靡曼不極君子弗欽雖聞贍
辭之銳無會野人之心

君子曰白藏肅殺天高野清玉樹始落金葉初
榮幕鷲北反沙鴈南征寔秋收之美節將校獵
以娛情使櫪無伏馬巷靡遺行執戈於芋眠之
野彎弧於曠浪之陰養由輕盼則林摧驚獸蒲
且效技則虛下翔禽騰猿蹙其足虓虎不擇音
掩兔麟鹿旣茂古之烏有填坑滿谷亦取昔之
上林至於輕繳纔飛則連鴻解羽微纖始放則
並鱗失波豈論玄泉之則寧願將遨之歌弭節
言旋禽不可筭周旋眺覽足爲京觀子雖山栖

其從此玩逸士曰解網垂仁殷王美則聞聲不
食孔聖淑音害蠹類而爲樂豈君子之用心

君子曰蓋聞地美養木君人愛士澤被無垠光
照郊鄙蒲輪必鄒魯之儒宗紆青必洛陽之才
子大漢愧得人之盛有周慙以寧之美萬國若
翁從四海同使指刑措弗用囹圄斯虛旣講禮
於太學亦論詩於石渠戈有載戢史無絕書銅
律應度玉燭調和黃髮擊壤青衿興歌元帥奇
士庠序鴻生求禮義之汲汲行仁義之明明隆

承椽之義却璚瑁之榮當朝有仁義之睦邊境
無煙塵之驚信如四氣明並三光厨楚挺茂堦
奠吐芳瑞鹿摘素祥熊爨黃靈禽樂園儀鳳栖
堂太平之瑞寶鼎樂協之應玉羊丹鳥表色玉
露呈瀼野絲垂木嘉苗貫桑固以德苞子奴道
邁虞唐六合寧泰四宇咸康不煩一戟東甌膜
拜詎勞一卒西域獻琛鹿蠡稽顙以悛惡樓蘭
面縛而革音吾皆去鼻飲之穴棄烏舉之深固
以澤流無外恩被遐方福比嵩岱道則穹蒼登

有聞若斯之化而藏其皮冠哉逸士曰鄙人寡
識守節田隅不聞智士之教將自潛以糜軀請
伏道而從命願開志以滌慮

贊

弓矢贊

弓用筋角矢製良工亦以觀德非止臨戎楊葉
命中援墮長空

制法則贊

惟斯法則信如四時嚴此刑政刑輕罪疑霜威
以振民不敢欺

蟬贊

茲蟲清潔惟露是餐寂寞秋序咽嘶夏闌豈伊

不美曜彼華冠

傳

陶靖節傳

陶淵明字元亮或云潛字淵明潯陽柴桑人也
曾祖侃晉大司馬淵明少有高趣博學善屬文
頽脫不群任真自得嘗著五柳先生傳以自況
曰先生不知何許人也亦不詳姓字宅邊有五
柳樹因以爲號焉閑靜少言不慕榮利好讀書
不求甚解每有會意欣然忘食性嗜酒而家貧
不能恒得親舊知其如此或置酒招之造飲輒

盡期在必醉旣醉而退曾不恡情去畱環堵蕭
然不蔽風日短褐穿結簞瓢屢空晏如也嘗著
文章自娛顯示已志忘懷得失以此自終時人
謂之實錄親老家貧起爲州祭酒不堪吏職少
日自解歸州召主簿不就躬耕自資遂抱羸疾
江州刺史檀道濟往候之偃臥瘠餒有日矣道
濟謂曰賢者處世天下無道則隱有道則至今
子生文明之世奈何自苦如此對曰潛也何敢
望賢志不及也道濟饋以梁肉麾而去之後爲

鎮軍建威參軍謂親朋曰聊欲弦歌以爲三徑之資可乎執事者聞之以爲彭澤令不以家累自隨送一力給其子書曰汝旦夕之費自給爲難今遣此力助汝薪水之勞此亦人子也可善遇之公田悉令吏種秫曰吾常得醉於酒足矣妻子固請種秔乃使二頃五十畝種秫五十畝種粳歲終會郡遣督郵至縣吏請曰應束帶見之淵明歎曰我豈能爲五斗米折腰向鄉里小兒卽日解綬去職賦歸去來徵著作郎不就江

州刺史王弘欲識之不能致也淵明嘗往廬山
弘命淵明故人龐通之齎酒具於半道栗里之
間邀之淵明有脚疾使一門生二兒舁籃輿旣
至欣然便其飲酌俄頃弘至亦無恙也先是顏
延之爲劉柳後軍功曹在潯陽與淵明情款後
爲始安郡經過潯陽日造淵明飲焉每往必酣
飲至醉弘欲邀延之坐彌日不得延之臨去畱
二萬錢與淵明淵明悉遣送酒家稍就取酒嘗
九月九日出宅邊菊叢中坐久之蒲手把菊忽

值弘送酒至卽便就酌醉而歸淵明不解音律
而蓄無弦琴一張每酒適輒撫弄以寄其意貴
賤造之者有酒輒設淵明若先醉便語客我醉
欲眠卿可去其真率如此郡將常候之值其釀
熟取頭上葛巾漉酒漉畢還復著之時周續之
入廬山事釋慧遠彭城劉遺民亦遁迹匡山淵
明又不應徵命謂之潯陽三隱後刺史檀韶苦
請續之出州與學士祖企謝景夷三人共在城
北講禮加以讐校所住公廨近於馬隊是故淵

明示其詩云周生述孔業祖謝響然臻馬隊非
講肆校書亦已勤其妻翟氏亦能安勤苦與其
同志自以曾祖晉世宰輔耻復屈身後代自宋
高祖王業漸隆不復肯仕元嘉四年將復徵命
會卒時年六十三世號靖節先生

梁昭明太子集卷之五

梁昭明太子蕭統著

義

解二諦義

并問答

二諦理實深玄自非虛懷無以通其弘遠明道之方其由非一舉要論之不出境智或時以境明義或時以智顯行至於二諦卽是就境明義若迷其方三有不絕若達其致萬累斯遣所言二諦者一是真諦二名俗諦真諦亦名第一義

諦俗諦亦名世諦真諦俗諦以定體立名第一
義諦世諦以褒貶立目若以次第言說應云一
真諦二俗諦一與二合數則爲三非直數過於
二亦名有前後於義非便真既不因俗而有俗
亦不出真而生正可得言一真一俗真者是實
義卽是平等更無異法能爲雜間俗者卽是集
義此法得生浮僞起作第一義者就無生境中
別立美名言此法寔勝寔妙無能及者世者以
隔別爲義生滅流動無有住相涅槃經言出世

人所知名第一義諦世人所知名爲世諦此卽
文證褒貶之理二諦立名差別不同真俗世等
以一義說第一義諦以二義說正言此理德旣
第一義亦第一世旣浮僞更無有義所以但立
世名諦者以審實爲義真諦審實是真俗諦審
實是俗真諦離有離無俗諦卽有卽無卽有卽
無斯是假名離有離無此爲中道真是中道以
不生爲體俗旣假名以生法爲體

南澗寺慧超諮曰浮僞起作名之爲俗離於有

無名之爲真未審浮僞爲當與真一體爲當有
異令旨答曰世人所知生法爲體出世人所知
不生爲體依人作論應如是說若論真卽有是
空俗指空爲有依此義明不得別異又諮真俗
旣云一體未審真諦亦有起動爲當起動自動
不關真諦令旨又答真理寂然無起動相凡夫
感識自橫見起動又諮未審有起動而凡夫橫
見無起動而凡夫橫見令旨又答若有起動則
不名橫見以無動而見動所以是橫又諮若法

無起動則唯應一諦令旨又答此理常寂此自
一諦橫見起動復是一諦唯應有兩不得言一
又諮爲有橫見爲無橫見令旨又答依人爲語
有此橫見又諮若依人語故有橫見依法爲談
不應見動令旨又答法乃無動不妨橫者自見
其動

丹陽尹晉安王蕭綱諮曰解旨依人爲辨有生
不生未審浮虛之與不生只是一體爲當有異
令旨答曰凡情所見見其起動聖人所見見其

不生依人爲論乃是異體若語相卽則不成異
具如向釋不復多論又諮若真不異俗俗不異
真豈得俗人所見生法爲體聖人所見不生爲
體令旨答卽俗知真卽真見俗就此爲談自成
無異約人辨見自有生不生殊又諮未審俗諦
之體旣云浮幻何得於真寔之中見此浮幻令
答真寔之體自無浮幻惑者橫構謂之爲有無
傷真寔體自虛玄又諮聖人所見見不流動凡
夫所見自見流動旣流不流異愚謂不得爲一

令答不謂流不流各是一體正言凡夫於不流之中橫見此流以是爲論可得成一又諮真寂之體本自不流凡夫見流不離真體然則但有一真不成二諦令答體恒相卽理不得異但凡見浮虛聖覩真寂約彼凡聖可得立二諦名招提寺慧琰諮曰凡夫見俗以生法爲體聖人見真以不生爲體未審生與不生但見其異復依何義而得辨一令答曰凡夫於無稱有聖人卽有辯無有無相卽此談一體又諮未審此得

談一一何所名令答正以有不異無無不異有
故名爲一更無異名又諮若無不異有有不異
無但見其一云何爲二令答凡夫見有聖人見
無兩見旣分所以成二又諮聖人見無無可稱
諦凡夫見有何得稱諦令答聖人見無在聖爲
諦凡夫審謂爲有故於凡爲諦

栖玄寺曇宗諮曰聖人爲見世諦爲不見世諦
令答曰聖知凡人見有世諦若論聖人不復見
此又諮聖人旣不見世諦云何以世諦教化衆

生令答聖人無惑自不見世諦無妨聖人知凡
夫所見故曲隨物情說有二諦又諮聖人知凡
見世諦卽此凡夫不令答此凡卽是世諦聖人
亦不見此凡又諮聖旣不見凡焉知凡見世諦
令答聖雖自無凡亦能知有凡自謂爲有故曲
赴其情爲說世諦

司徒從事中郎王規諮曰未審真俗旣不同豈
得相卽之義令答聖人所得自見其無凡人所
得自見其有見自不同無妨俗不出真外又諮

未審既無異質而有二義爲當義離於體爲當
卽義卽體令答更不相出名爲一體愚聖見殊
自成異義又諮凡夫爲但見俗亦得見真令答
止得見俗不得見真又諮體既相卽寧不覩真
令答凡若見真不應覩俗覩俗既妄焉得見真
靈根寺僧遷諮曰若第一以無過爲義此是讚
歎之名真離於俗亦應是讚歎之名令答曰卽
此體真不得言歎第一義諦既更立美名所以
是歎又諮無勝我者既得稱讚歎我體卽真何

故非歎令答無勝我者所以得稱讚歎我體卽
真亦是我真故非讚歎又諮我無過者所以得
稱讚歎我是不僞何得非讚令答不僞直是當
體之名如人體義謂之解義正是稱其實體豈
成讚歎又諮此法無能出者焉得卽是讚歎令
答旣云無出非讚如何

羅平侯蕭正立諮曰未審俗諦是生法以不令
答曰俗諦之體正是生法又諮俗旣橫見何得
有生令答橫見爲有所以有生又諮橫見爲有

寔自無云寔旣無法說何爲生令答卽此生法
名爲橫見亦卽此橫見名爲生法又諮若是橫
見不應有生若必有生何名橫見令答旣云橫
見寔自無生但橫見爲有有此橫生

衡山侯蕭恭諮曰未審第一義諦旣有義目何
故世諦獨無義名令答曰世旣浮俗無義可辨
又諮若無義可辨何以稱諦令答凡俗審見故
立諦名又諮若凡俗見有得受諦名亦應凡俗
見有得安義字令答凡俗審見故諦名可立浮

俗無義何得強字爲義又諮浮俗雖無寔義不
無浮俗之義既有此浮俗何得不受義名令答
正以浮俗故無義可辯若有義可辯何名浮俗
中興寺僧懷諮曰令旨解言真不離俗俗不離
真未審真是無相俗是有相有無相殊何得同
體令答曰相與無相此處不同但凡所見有卽
是聖所見無以此爲論可得無別又諮旣是一
法云何得見爲兩見旣有兩豈是一法令答理
乃不兩隨物所見故得有兩又諮旣有兩豈

不相違令答法若寔兩可得相違法常不兩人
見自兩就此作論焉得相乖又諮人見有兩可
說兩人理旣是一豈得有兩令答理雖不兩而
約人成兩

始興王第四男蕭映諮曰第一義諦其義第一
德亦第一不令答曰義旣第一德亦第一又諮
直言第一已包德義何得復加義字以致繁複
令答直言第一在義猶昧第一見義可得盡美
又諮若加以義字可得盡美何不加以德字可

得盡美令答第一是德豈待復加但加義字則
德義雙美又諮直稱第一是見其美偏加義字
似有所局令答第一表德復加義字二美俱陳
豈有所局

吳平世子蕭勵諮曰通旨云第一義諦世諦褒
貶立名真俗二諦定體立名尋真諦之理既妙
絕言慮未審云何有定體之旨令答曰談其無
相無真不真寄名相說以真定體又諮若真諦
無體今寄言辯體未審真諦無相何不寄言辯

相令答寄言辯體猶恐貶德若復寄言辯相則
有累虛玄又諮直諦玄虛離於言說今既稱有
真豈非寄言辯相令答寄有此名名自是相無
傷此理無相虛寂又諮未審此寄言辯體爲是
當理爲不當理令答無名而說名不合當理又
諮若寄言辯名名不當理未審此寄將何所說
令答雖不當理爲接引衆生須名相說
宋熙寺慧令諮曰真諦以不生爲體俗諦以生
法爲體而言不生卽生生卽不生爲當體中相

以當義中相卽令答云體中相卽義不相卽
又諮義旣不卽體云何卽令答凡見其有聖親
其無約見成異就體恒卽又諮體旣無兩何事
須卽令答若體無別兩緣見有兩見旣兩異須
明體卽又諮若如解旨果是就人明卽令答約
人見爲二二諦所以名生就人見明卽此亦何
妨

始興王第五男蕭曄諮曰真諦稱真是寔真不
令答曰得是寔真又諮菩薩會真之時爲忘俗

忘真不令答忘俗忘真故說會真又諮若忘俗
忘真故說會真忘俗忘真何謂實真令答若存
俗存真何謂實真正由兩遣故謂實真又諮若
忘俗忘真而是實真亦應忘真忘俗而是實俗
令答忘俗忘真所以見真忘真忘俗彌見非俗
又諮菩薩會真既忘俗忘真今呼寔真便成乖
理令答假呼實真終自忘真兩忘稱寔何謂垂
理

興皇寺法宣諮曰義旨云俗諦是有是無故以

生法爲體未審有法有體可得稱生無是無法
云何得有生義令答曰俗諦有無相待而立既
是相待故並得稱生又諮若有無兩法並稱爲
生生義旣一則有無無異令答俱是凡夫所見
故生義得同是有是無焉得不異又諮若有無
果別應有生不生令答旣相待立名故同一生
義

程鄉侯蕭祗諮曰未審第一之名是形待以不
令答曰正是形待又諮第一無相有何形待令

答既云第一豈得非待又諮第一是待既稱第一世諦待於第一何不名爲第二若俗諦是待而不稱第二亦應真諦是待不名第一令答若稱第一是待於義已足無假說俗第二方成相待又諮若世諦之名不稱第二則第一之稱無所形待令答第一褒真既云相待世名是待直置可知

光宅寺法雲諮曰聖人所知之境此是真諦未審能知之智爲是真諦爲是俗諦令答曰能知

是智所知是境智來冥境得言卽真又諮有智之人爲是真諦爲是俗諦令答若呼有智之人卽是俗諦又諮未審俗諦之人何得有真諦之智令答聖人能忘於俗所以得有真智又諮此人旣冥無生亦應不得稱人令答冥於無生不得言人旣名相說常自有人

靈根寺慧令諮曰爲於真諦中見有爲俗諦中見有令答曰於真諦中橫見有俗又諮俗諦之有爲寔爲虛令答是虛妄之有又諮爲當見妄

爲當見有令答見於妄有又謔無名相中何得
見有名相令答於無名相見有名相所以妄有
又謔於無名相妄見爲有譬如火熱惑者言冷
得就熱中有冷相不若於無相而有名相亦於
火中應有此冷令答火自常熱妄見有冷此自
惑冷熱不啻異

湘宮寺慧興謔曰凡夫之惑爲當但於真有迷
於俗亦迷令答曰於真見有此是迷真旣見有
俗不成迷俗又謔若使解俗便成解真若不解

行豈得解俗令答真理虛寂惑心不解雖不解
真何妨解俗又諮此心不解真於真可是惑此
心既解俗於惑應非惑令答實而爲語通自是
惑辨俗森羅於俗中各解

莊嚴寺僧旻諮曰世俗心中所得空解爲是真
解爲是俗解令答可名相似解又諮未審相似
爲真爲俗令答習觀無生不名俗解未見無生
不名真解又諮若能照之智非真非俗亦應所
照之境非真非俗若是非真非俗則有三諦令

答所照之境既卽無生無生是真豈有三諦又
諮若境卽真境何不智卽真智令答未見無生
故非真智何妨此智未真而習觀真境豈得以
智未體而使境非真境

宣武寺法寵諮曰真諦不生不滅俗諦有生有
滅真俗兩義得言有異談其法體只得是一未
審體從於義亦得有二不令答曰體亦不得合
從於義又諮未審就凡聖兩見得言兩義亦就
凡聖兩見得言兩體令答理不相異所以云一

施凡聖兩見得有二體之殊又諮若使凡者見有聖人見無便應凡夫但見世諦有聖人應見太虛無令答太虛亦非聖人所見太虛得名由於相待既由待生並凡所見又諮凡夫所見空有得言是一不令答就凡爲語有實異無約聖作談無不具有

建業寺僧愍諮曰俗人解俗爲當解俗參差而言解俗爲當見俗虛假而言解俗令答曰只是見俗參差而言解俗又諮俗諦不但參差亦是

虛妄何故解參差而不解虛妄令答若使凡夫
解虛妄卽是解真不解虛妄所以名爲解俗
光宅寺敬脫諮曰未審聖人見真爲當漸見爲
當頓見令答曰漸見又諮無相虛懷一見此理
萬相並寂未審何故見真得有由漸令答自凡
之聖解有淺深真自虛寂不妨見有由漸又諮
未審一得無相並忘萬有爲不悉忘令答一得
無相萬有悉忘又諮一得無相忘萬有者亦可
一得虛懷窮彼真境不應漸見令答如來會寂

自是窮真淺行聖人恒自漸見又諮若見真有
漸不可頓會亦應漸忘萬有不可頓忘令答解
有優劣故有漸見忘懷無偏故萬有並寂

解法身義

并問答

法身虛寂遠離有無之境獨脫因果之外不可以智知不可以識識豈是稱謂所能論辨將欲顯理不容默然故隨從言說致有法身之稱天竺云達摩舍利此土謂之法身若以當體則是自性之目若以言說則是相待立名法者軌則爲首身者有體之義軌則之體故曰法身略就言說粗陳其體是常住身是金鋼身重加研覈其則不爾若定是金鋼卽爲名相定是常住便

成方所所謂常住本是寄名稱曰金剛本是譬
說及談寔體則性同無生故云佛身無爲不墮
諸法故涅槃經說如來之身非身是身無量無
邊無有足迹無知無形畢竟清淨無知清淨而
不可爲無稱曰妙有而復非有離無離有所謂
法身

招提寺慧琰諮曰未審法身無相不應有體何
得用體以釋身義令答曰無名無相乃無體可
論寄以名相不無妙體又諮若寄以名相不無

相則寄以名相不成無相令答旣云寄以名
相近明理寔無相又諮若寄以名相而理寔無
相理旣無相云何有體令答寄言軌物何得無
體又諮亦應寄言軌物非復無相令答軌物義
邊理非無相所言無相本談妙體又諮真寔本
來無相正應以此軌物何得隱斯真寔強生言
相令答真寔無相非近學所窺是故接諸庸淺
必須寄以言相

光宅寺法雲諮曰未審法身常住是萬行得不

令答曰名相道中萬行所得又諮旣爲萬行所得豈是無相若必無相豈爲萬行所得令答無名無相何曾有得寄以名相假言有得又諮寔有萬行實得佛果安可以無相全無所得令答問者住心謂實有萬行今謂萬行自空豈有實果可得又諮現有衆生修習萬行未審何故全謂爲無令答凡俗所見謂之爲有理而檢之實無萬行又諮經說常住以爲妙有如其假說何謂妙有令答寄以名相故說妙有理絕名相何

如何有

莊嚴寺僧旻諮曰未審法身絕相智不能知絕
相絕知何得猶有身稱令答曰無名無相曾有
何身假名相說故曰法身又諮亦應假名相說
是智所照何得不可以智知不可以識識令答
亦得寄名相慧眼所見又諮若慧眼能見則可
以智知若智不能知則慧眼無見令答慧眼無
見亦無法可見又諮若云無見有何法身令答
理絕聞見寔無法身又諮若無法身則無正覺

正覺既有法身豈無令答恒是寄言故有正覺
正覺既在寄言法身何得定有

宣武寺法寵謚曰永審法身之稱爲正在妙本
金姿丈六亦是法身令答曰通而爲論本迹皆
是別而爲語止在常住又謚若止在常住不應
有身若通取丈六丈六何謂法身令答常住旣
有妙體何得無身丈六亦能軌物故可通稱法
身又謚若常住無累方稱法身丈六有累何謂
法身令答衆生注仰妄見丈六丈六非有有何

寔累又諮若丈六非有指何爲身令答隨物見
有謂有應身又諮旣曰應身何謂法身令答通
相爲辨故兼本迹覈求寔義不在金姿

靈根寺慧令諮曰未審爲以極智名曰法身爲
以絕相故曰法身令答曰無名無相是集藏法
身圓極智慧是實智法身又諮無名無相則無
身不身旣有法身何謂無相令答正以無相故
曰法身又諮若以無相故曰法身則智慧名相
非復法身令答旣是無相智慧豈非法身又諮

如其有身何名無相若是無相何得有身令答
於無名相假說法身又諮若假說法身正存名
相云何直指無相而謂法身令答旣於無相假
立名相豈得異此無相而說法身

靈味寺靜安諮曰未審法身乘應以不令答曰
法身無應又諮本以應化故稱法身若無應化
何謂法身令答曰本以軌則之體名爲法身應
化之談非今所軌又諮若無應化云何可軌旣
爲物軌豈無應化令答衆生注仰蒙益故云能

爲物軌化緣已畢何所應化又諮若能益衆生
便成應化若無應化何以益物令答能生注仰
軌則自成何勞至人俯應塵俗又諮旣生注仰
豈無應化若無應化注仰何益令答正由世尊
至極神妙特深但令注仰自然蒙祐若應而後
益何謂至神不應而益故成窮美若必令實應
與菩薩豈殊

附錄

昭明太子傳

陳姚 察

昭明太子統字德施高祖長子也母曰丁貴嬪
初高祖未有男義師起太子以齊中興元年九
月生於襄陽高祖既受禪有司奏立儲副高祖
以天下始定百度多闕未之許也群臣固請天
監元年十一月立爲皇太子時太子年幼依舊
居於內拜東宮官屬文武皆入直永福省太子
生而聰叡三歲受孝經論語五歲遍讀五經悉

能諷誦五年五月庚戌始出居東宮太子性仁孝自出宮恒思戀不樂高祖知之每五日一朝多便留永福省或五日三日乃還宮八年九月於壽安殿講孝經盡通大義講畢親臨釋奠于國學十四年正月朔旦高祖臨軒冠太子於太極殿舊制太子著遠遊冠金蟬翠綏纓至是加金博山太子美姿貌善舉止讀書數行並下過目皆憶每遊宴祖道賦詩至十數韻或命作劇韻賦之皆屬思便成無所點易高祖大弘佛教

親自講說太子亦崇信三寶遍覽衆經乃於宮
內別立慧義殿專爲法集之所招引名僧談論
不絕太子自立三諦法身義並有新意普通元
年四月甘露降于慧義殿咸以爲至德所感焉
三年十一月始興王憺薨舊事以東宮禮絕傍
親書翰並依常儀太子意以爲疑命僕射劉孝
綽議其事孝綽議曰案張鏡撰東宮儀記稱三
朝發哀者踰月不舉樂鼓吹寢奏服限亦然尋
傍絕之義義在去服服雖可奪情豈無悲饒歌

輟奏良亦爲此既有悲情宜稱蕪慕卒哭之後
依常舉樂稱悲竟此理例相符謂猶應稱蕪慕
至卒哭僕射徐勉左率周捨家令陸襄並同孝
綽議太子令諸賢更共詳衷司農卿明山賓步
兵校尉朱异議稱慕悼之解宜終服月於是令
付典書遵用以爲永準七年十一月貴嬪有疾
太子還永福省朝夕侍疾衣不解帶及薨步從
喪還宮至殯水漿不入口每哭輒慟絕高祖遣
中書舍人顧協宣旨曰毀不滅性聖人之制禮

不勝喪比於不孝有我在那得自毀如此可卽
彊進飲食太子奉勅乃進數合自是至塋日進
麥粥一升高祖又勅曰聞汝所進過少轉就羸
瘠我比更無餘病正爲汝如此胸中亦圯塞成
疾故應強加饘粥不使我恒爾懸心雖屢奉勅
勸逼日止一溢不啻菜果之味體素壯腰帶十
圍至是減削過半每入朝士庶見者莫不下泣
太子自加元服高祖便使省萬機内外百司奏
事者填塞於前太子明於庶事纖毫必曉每所

奏有謬誤及巧妄皆卽就辯析示其可否徐令
改正未嘗彈糾一人平斷法獄多所全宥天下
皆稱仁性寬和容衆喜愠不形於色引納木學
之士賞愛無倦恒自討論篇籍或與學士商確
古今閒則繼以文章著述率以爲常于時東宮
有書幾三萬卷名才並集文學之盛晉宋以來
未之有也性愛山水於玄圃穿築更立亭館與
朝士名素者遊其中嘗泛舟後池番禺侯軌盛
稱此中宜奏女樂太子不答詠左思招隱詩曰

何必絲與竹山水有清音
戾慙而止出宮二十
餘年不畜聲樂少時勅賜大樂女妓一部畧非
所好普通中大軍北討京師穀貴太子因命菲
衣減膳改常饌爲小食每霖雨積雪遣腹心左
右周行閭巷視貧困家有流離道路密加賑賜
又出主衣綿帛多作襦袴冬月以施貧凍若炮
亡無可以斂者爲備棺槨每聞遠近百姓賦役
勤苦輒斂容色常以戶口未寔重於勞擾吳興
郡屢以水災失收有上言當漕大瀆以瀉浙江

中大通二年春詔遣前交州刺史王弁假節發
吳郡吳興義興三郡民丁就役太子疏諫止
高祖優詔以喻焉太子孝謹天至每入朝未五
鼓便守城門開東宮雖燕居內殿一坐一起恒
向西南面臺宿被召當入危坐達旦三年三月
寢疾恐貽高祖憂勅參問輒自力手書啓及稍
篤左右欲啓聞猶不許曰云何今至尊知我如
此惡因便鳴咽四月乙巳薨時年三十一高祖
幸東宮臨哭盡哀詔斂以衮冕謚曰昭明五月

庚寅葬安寧陵詔司徒左長史王筠爲哀冊文
太子仁德素著及薨朝野惋愕京師男女奔走
宮門號泣滿路四方氓庶及疆徼之民聞喪皆
慟哭所著文集二十卷又撰古今典誥文言爲
正序十卷五言詩之善者爲文章英華二十卷
文選三十卷

陳吏部尙書姚察曰孟軻有言雞鳴而起孳孳
爲善者舜之徒也若乃布衣韋帶之士在於猷
畝之中終日爲之其利亦已博矣况乎處重明

之位居正體之尊克念無怠烝烝以孝大舜之
德其何遠之有哉

昭明太子傳

唐李延壽

昭明太子統字德施小字維摩武帝長子也以
齊中興元年九月生于襄陽武帝旣年垂強仕
方有冢嗣時徐元瑜降而續人荊州使至云蕭
穎胄暴卒時人謂之三慶少日而建業平識者
知天命所集天監元年十一月立爲皇太子時
年幼依舊於內拜東宮官官屬文武皆入直永福
省五年五月庚戌出居東宮太子生而聰敏三
歲受孝經論語五歲遍讀五經悉通諷誦性仁

孝自出宮恒思戀不樂帝知之每五日一朝多
便畱永福省或五日三日乃還宮八年九月於
壽安殿講孝經盡通大義講畢親臨釋奠于國
學年十二於內省見獄官將讞事問左右曰是
皁衣何爲者曰廷尉官屬召視其書曰是皆可
念我得判否有司以統幼詒之曰得其獄皆刑
罪上統皆署杖五十有司抱具獄不知所爲具
言於帝帝笑而從之自是數使聽訟每有欲寬
縱者卽使太子決之建康縣讞誣人誘口獄翻

縣以太子仁愛故輕當杖四十令曰彼若得罪
便合家拏戮今縱不以其罪罪之豈可輕罰而
已可付治十年十四年正月朔旦帝臨軒冠太
子於太極殿舊制太子著遠遊冠金蟬翠綵纓
至是詔加金博山太子美姿容善舉止讀書數
行並下過目皆憶每游宴祖道賦詩至十數韻
或作劇韻皆屬思便成無所點易帝大弘佛教
親自講說太子亦素信三寶徧覽衆經乃於宮
內別立慧義殿專爲法集之所招引名僧自立

三諦法義普通元年四月甘露降于慧義殿咸以爲至德所感時俗稍奢太子欲以已率物服御朴素身衣浣衣膳不兼肉三年十一月始興王憺薨舊事以東宮禮絕傍親書翰並依常儀太子以爲疑命僕射劉孝綽議其事孝綽議曰

多見 覲撰東宮儀記稱三朝發哀者踰月不舉

樂鼓吹寢奏服限亦然尋傍絕之義義在去服服雖可奪情豈無悲饒歌輟奏良亦爲此既有悲情宜稱兼慕卒哭之後依常舉樂稱悲竟此

理例相符謂猶應蕪慕請至卒哭僕射徐勉左
率周捨家令陸襄並同孝綽議太子令諸賢更
共詳衷司農卿明山賓步兵校尉朱异議稱慕
悼之辭宜終服月於是付典書遵用以爲永準
七年十一月貴嬪有疾太子還永福省朝夕侍
疾衣不解帶及薨步從喪還宮至殯水漿不入
口每哭輒痛絕武帝勅中書舍人顧協宣旨曰
毀不減性聖人之制不勝喪比於不孝有我在
那得自毀如此可卽強進飲粥太子奉勅乃進

數合自是至塋日進麥粥一升雖屢奉勅勸逼
終喪日止一溢不管菜果之味體素壯腰帶十
圍至是減削過半每入朝士庶見者莫不下泣
太子自加元服帝便使省萬機內外百司奏事
者填塞於前太子明於庶事每所奏謬誤巧妄
皆卽辯折示其可否徐令改正未嘗彈糾一人
平斷法獄多所全宥天下皆稱仁性寬和容衆
喜愠不形於色引納才學之士賞愛無倦恒自
討論墳籍或與學士商權古今繼以文章著述

率以爲常于時東宮有書幾三萬卷名才並樂
文學之盛晉宋以來未之有也性愛山水於玄
圃穿築更立亭館與朝士名素者遊其中嘗泛
舟後池番禺侯軌盛稱此中宜奏女樂太子不
答詠左思招隱詩云何必絲與竹山水有清音
軌慙而止出宮二十餘年不畜音聲未幾少時
敕賜太樂女伎一部略非所好普通中大軍北
侵都下米貴太子因命菲衣減膳每霖雨積雪
遺腹心左右周行閭巷視貧困家及有流離道

路以米密加賑賜人十石又出主衣絹帛年常
多作襦袴各三千領冬月以施寒者不令人知
若死亡無可歛則爲備棺槨每聞遠近百姓賦
役勤苦輒歛容變色常以戶口未實重於勞擾
吳郡屢以水災不熟有上言當漕大瀆以瀉浙
江中大通二年奉詔遣前交州刺史王奔假節
發吳吳興信義三郡人丁就役太子上疏請罷
武帝優詔以喻焉太子孝謹天至每入朝未五
鼓便守城門開東宮雖燕居內殿一坐一起恒

向西南面臺宿被召當入危坐達旦三年三月
游後池乘雕文舸摘芙蓉姬人蕩舟沒溺而得
出因動股恐貽帝憂深誠不言以寢疾聞武帝
敕省間輒自力手書啓及稍篤左右欲啓聞猶
不許曰云何令至尊知我如此惡因便嗚咽四
月乙巳暴惡馳啓武帝比至已薨時年三十一
帝臨哭盡哀詔歛以袞冕謚曰昭明五月庚寅
葬安寧陵詔司徒左長史王筠爲哀冊文朝野
惋愕都下男女奔走官門號泣滿路四方毗庶

及墻微之人聞喪者哀慟太子性仁恕見在宮
禁防親刑子者問之云以清道驅人太子恐復
致痛使獄吏板代之頻食中得蠅蟲之屬密置
枰邊恐耐人獲罪不令人知又見後閣小兒攤
戲後蜀有獄牒攤者法士人結流徒庶人結徒
太子曰私錢自戲不犯公物此科太重令注刑
止三歲士人免官獄牒應死者必降長徒自此
以下莫不減半所著文集二十卷又撰古今典
誥文言爲正序十卷五言詩之善者爲英華集

二十卷文選三十卷薨後長子東宮郎將南徐
州刺史華容公歡封豫章郡王次子枝江公譽
封河東郡王曲江公譽封岳陽郡王警封武昌
郡王鑒封義陽郡王各三千戶女悉同正主蔡
妃供侍一同常儀唯別立金華宮爲異帝旣廢
嫡立庶海內噂噉故各封諸子大郡以慰其心
岳陽王譽流涕受拜累日不食初丁貴嬪薨太
子遣人求得善墓地將斬草有賣地者因闔人
僉三副求市若得三百萬許以百萬與之三副

密啓武帝言太子所得地不如今所得地於帝
吉帝末年多忌便命市之葬畢有道士善圖墓
云地不利長子若厭伏或可申延乃爲蠟鷲及
諸物埋墓側長子位有官監鮑邈之魏雅者二
人初並爲太子所愛邈之晚見疎於雅密啓武
帝云雅爲太子厭禱帝密遣榆栢果得鷲等物
大驚將窮其事徐勉固諫得止於是唯誅道士
由是太子迄終以此慙慨故其嗣不立後邵陵
王臨丹陽郡因邈之與鄉人爭婢議以爲誘畧

之罪牒官簡文追感太子寃揮淚誅之邈之兄
子僧隆爲官直前未知邈之姪卽日驅出先是
人間謠曰鹿子開城門城門鹿子開當開復未
開使我心徘徊城中諸少年逐歡歸去來鹿子
開者反語爲來子哭云帝哭也歡前爲南徐州
太子果薨遣中書舍人臧厥追歡於崇正殿解
髮臨哭歡旣嫡孫次應嗣位而遲疑未決帝旣
新有天下恐不可以少主主大業又以心銜故
意在晉安王猶豫自四月上旬至五月二十一

日方決歡止封豫章王還任往謠言心徘徊者
未定也城中諸少年逐歡歸去來復遠徐方之
象也歡字孟孫位雲麾將軍江州刺史薨謚安
王子棟嗣

哀策文

梁王 筠

蜃輅俄軒龍駟步羽翮前驅雲旂北御皇帝
哀繼明之寢耀痛嗣德之殂芳御武帳而悽慟
臨甲觀而增傷式稽令典載揚鴻烈詔撰德於
旌旒永傳徽於舞綴其辭曰式載明兩寔惟以
陽旣稱上嗣且曰元良儀天比峻儼景騰光奉
祀延福守器傳芳睿哲膺期旦暮斯在外弘莊
肅內含和愷識洞機深量苞瀛海立德不器至
功弗宰寬綽居心溫恭成性循時孝友率由嚴

敬咸有種德惠和齊聖三善遞宣萬國同慶軒
緯掩精陰義弛位纏哀在疚殷憂銜恤孺泣無
時蔬饘不溢禪遵踰月哀號未畢寔惟監撫亦
嗣郊禋問安肅肅視膳恂恂金華玉璫玄駟斑
輪隆家幹國主祭安民光奉成務萬機是理矜
愼庶獄勤恤關市誠存隱側容無愠喜殷勤博
施綢繆恩紀爰初敬業離經斷句莫爵崇師卑
躬待傳靈資導習匪勞審諭博約是司時敏斯
務辯究空微思探獎贖馳神圖緯研精爰畫沈

吟興優游方冊厭飫膏腴含咀肴核括囊流
畧包舉藝文遍該紉素殫極丘墳騰帙充積儒
墨區分瞻河闡訓望魯揚芬吟咏性靈豈惟薄
伎屬詞婉約緣情綺靡字無點竄筆不停紙壯
思泉流清華雲委總覽時才網羅英茂學窮優
洽辭歸繁富或擅談叢或稱文囿四友推德七
子慙秀望苑招賢華池愛客託乘同舟連輿接
席摛文揆藻飛觴汎醪恩隆置醴賞逾賜璧徵
風霞被盛業日新仁器非重德輶易遵澤流兆

庶福降百神四方慕義天下歸仁雲物告徵稷
沴寒象星糴恒耀山頽朽壤靈儀上賓德音長
往具僚無蔭謫永安仰嗚呼哀哉皇情悼愍切
心纏痛胤嗣長號跼萼增慟慕結親遊悲動民
衆憂若殄邦懼同折棟嗚呼哀哉首夏司開麥
秋紀節容衛徒警菁華委絕書幌空張談筵罷
設虛饋饌饒孤燈翳翳嗚呼哀哉簡辰請日筮
合龜貞幽挺夙啓玄宮獻成武校齊列文物增
明昔遊漳滏賓從無聲今歸郊郭徒御相驚鳴

呼哀哉背絳闕以遠徂輔青門而徐轉指馳道
而詎前望國都而不踐陵脩阪之威夷遡平原
之悠緬驥蹠足以酸嘶挽悽鏘而流法嗚呼哀
哉混哀音於簫籟變愁容於天日雖夏木之森
陰返寒林之蕭瑟旣將反而復疑如有求而遂
失調天地其無心遽永潛於容質嗚呼哀哉卽
玄宮之冥漠安神寢之清闕傳聲華於懋典觀
德業於徽謚懸忠貞於日月播鴻名於天地惟
小臣之紀言實含毫而無媿嗚呼哀哉

求擬昭明太子集表

蕭子範

姬旦云亡播禮樂於百代宣尼旣歿傳雅頌於
千祀夏啓之風載傳樂世周晉之迹止在洛濱
八侍四公西京見美長壽一察東漢流名魏擊
之悟篋衣事關戰國孫登之愛田苗義屬偏霸
各稱小善靡擅雕蟲子桓雖詩賦可喜矩範頓
闕貽譏良史取誚前載備而爲論發奧久歸自
少陽潛位震方滅采神儀長往銅龍毀構音顏
緬邈舟壑遷移若乃緣情體物繁絃縹錦縱橫

月
思籠蓋辭林積練累素盈車滿笈金石有銷
斯
方遠既異陳王之躬撰又非東陽之自集
輕身示微塵露豹班嚴駕永輟駢聯
主懷慈伏深涕慕冒乞銓次遺藻勒成卷軸

玄圃園講賦

梁蕭子雲

曰天監之十七屬儲德之方宜惟玉帛之光盛
信昌符之在焉於是上照天下漏泉輪囷之氣
上煙日月之景揚員乃聖武之龍飛載爲家於
天下思承規於景數遂長發而明社若重光於
日月似二英於皇夏方前星而列曜播洪鐘於
胤雅去茲永福來卽東朝文物是紀聲明是昭
發玄章於粉纈靡青綬於翠翹鑾納那而垂藻
笳和鳴以承簫載錫其光令聞令望察情幄帳

讓齒虞庠性與天道言爲珪璋詩史遙集禮易
翔翔義華洛水文麗清漳昔七覺之吐華高人
天而爲長道西被乎日用法東流而未朗故授
神荊於文館寶冊於明兩異昔談而同世亦
千年而影響聞填填之法雷見慧雲之初爽真
如之軌旣接發揮之功已躡開金泥剖玉牒削
蒸栗之簡採羅樹之葉石室靈篇南宮神篋所
以一音不已而待規重矩疊者矣惟至人之講
道必山林之閒曠彼柰園與杏壇深淨名與素

王模清遊之浩瀼擬樂賢之隆壯膚情杳然是
焉侯帳乃高談玄圃之苑張樂宣猷之上觀夫
靈圃要妙總禁林之叫窳稟輦道之三星躔離
宮之六曜寫溟浚沼方華作峭其山則刻巖狔
豸豸碣磳詭詭坂墀截薛夏含霜雪下則谿壑泓
澄虹螭降升上則青霄丹氣雲霞鬱蒸金華琳
碧燭銀硯石藻玉摘白丹瑕流赤周以玉樹灌
叢紫桂香楓簣管含人桃枝育蟲妙草的皪靈
果垂蔓長卿寒翠簡子秋紅崖戴雲而吐雨木

鳴條而起風中有蘭渚率池淥流澍澍激水推
移彌望杳冥倒飛閣之嵯峨漾釣臺而浮迴張
翠帷於鴻臚泛羽旒於雀艇鳥則杉雞繡質木
客錦章戴勝吐綬鷓鴣鷗香壁龜紫鰲鷓鴣鴛
鵲風鳴日思高廣浮長內則錢荇菱華菡萏散
葩磈砢巨石潰漉碧砂離徒比目累綺紅蝦漂
青綸之蓑折蕩碧組之鬢髭銅龜受水而獨涌
石鯨吐浪而戴華所以藉園籞之壯觀將髣像
於毗邪於是清宮廣闕宿設宵張華燈熠燿火

杳杳芒歛閃六尺籠叢九光顏若流金之出沙
嶼粲若列宿之動天潢朝騰朗而戒旦雲依霏
而卷簇輕輦西園齊宮北園文衛濟濟僧徒肅
肅法鼓朗而震音歟香秘而流馥亦有百獸取
敗膠膠雲車九層芝駕四鹿吳姬楚豔胡笳燕
筑常從名倡戲馬蹋鞠巡少陽渡紫襖繞崇賢
輓承祿揚散華之飄飄響清楚於林木燈王歸
而贈筵香積來而獻熟似衆聖之乘空若能仁
之在目旣而俄軒有睥肆筵授几高殿肅而神

嚴微言欣而奏理煥嘉語於丹青得親承於音
音智周物而爲心情研幾而盡諦言超超而出
象理歷歷而踰繫魏兩娛心之談永足云晉儲
真假之理豈能遠史臣乃載筆撰功請事其職
賦金相模玉式世旣聞其露之言民已登仁壽
之域矣將奉瑤宮之軌陪雲樓之軌福穰穰委
如山長莫長永無極

謝東宮啟

梁劉孝綽

孝綽免官諸弟時隨藩在荆雍乃與書
論其治不平者十事其辭皆鄙到氏又
寫別本封呈東宮昭明
太子命焚之不開視也

臣聞之先聖以衆惡之必監焉衆好之必監焉
豈非孤特則積毀所歸比周則積譽斯信知好
惡之間必待明鑒故爨嬰再爲阿宰而前毀後
譽後譽出於阿意前毀由於直道是以一犬所
噬旨酒質其甘酸一手所搖嘉樹變其生死又
鄒陽有言士無賢愚入朝見嫉至若臧文之下

展季靳尚之放靈均絳侯之排賈生平津之陷
主父自茲厥後其徒寔繁曲筆短辭不暇殫述
寸管所窺常由切齒殿下誨道觀書俯同好學
前載枉直備該神覽臣昔因立侍親承緒言飄
風貝錦譬彼讒慝聖旨殷勤深以爲歎臣資愚
履直不能杜漸防微曾未幾何逢訕罹難雖吹
毛洗垢在朝而同嗟而嚴文峻法肆姦其必奏
不顧賣友志欲要君自非上帝運超已之光照
陵陽之虛舞文虛謫不取信於宸明在縲嬰縲

幸得蠲於庸闇裁下免黜之書仍願朝會之旨
小人未識通方繫馬縣車息絕朝覲方願滅影
銷聲遂移林谷不悟天聽罔已造次必彰不以
距違見疵復使引籍雲陞降寬和之色垂布帛
之言形之千載所蒙已厚况乃恩等特召榮同
起家望古自惟彌覺多忝但未渝丹石永藏輪
軌相彼工言構茲媒譏且歎各而生已凋柯葉
空延德澤無謝陽春

謝東宮賚園啓

梁張 纘

性愛山泉頗樂閒曠雖復伏膺堯門情存魏闕
至於一丘一壑自謂出處無辨常願卜居幽僻
屏遊誼座傍山臨流面郊負郭依林結宇憇桃
李之蔭陰對逕開軒採橘柚之秋實而王畿陸
海畝號一金涇渭土膏豪傑所競徙居好時必
待使越之裴別館河陽亦資牧荆之富此園左
帶平湖脩陂千頃右臨長薄清潭百仞前逼逸
陌朝夕爽塏後望鍾阜表裏煙霞每賸春迎夏

華卉競發背秋向冬雲物澄霽歸瞰戶牖不異
絲籥升降階墀已窮歷覽舟楫所屈累日不能
究其源魚鳥之豐山澤不能踰其美

謝皇太子賚果然禱啓

伏以狐裘熊席徒負舊名玄豹青狸未能適體
嚴冰在節朔飈結宇吹綸愧爰挾續慙溫但勤
非伏寢恩重夜覆道媿明經坐叨重席仰榮俯
媿進退在顏

蠟鵞辯

明張燮

昭明父子間備極慈孝何容有纖芥猜嫌帝之舍其子而立簡文也夫亦謂天下初定宜須長君耳延壽乃妄稱丁貴嬪塋地不利長子昭明用道士厭伏爲蠟鵞埋墓側宮監鮑邈之密啓武帝將窮其事徐勉固諫得止太子迄終用此慙慨帝以宿衿故胤嗣不立嗟乎貴嬪之薨以普通七年距中大通三年已六載矣太子日削萬機多所斷割減膳救饑徹衣炊凍種種佳事

又諫止三郡民丁就役豈負大慚者能作此舉
止哉且帝既晚年多忌業有宿物在胸不化安
得都無片語譙讓又那堪以事權頓委東朝全
無防閑之意直待薨後建儲纔洩此忿耶則延
壽之妄甚明也且云昭明薨後邈之坐事牒官
簡文追感太子寃揮淚誅之邈之兄子僧隆爲
宮直卽日驅去此皆誤以貴嬪無祿昭明繼逝
卽在轉盼故有此點綴若相隔六載僧隆豈能
蒙面許久與昭明歲歲相安至是始知爲邈之

任耶南史較諸史雅多逸聞然但一二碎事本
史失載而南史發之若厭伏果真父子間許大
猜釁姚察作傳豈容全不照管恐姚無此缺漏
也至于昭明性不好弄屏絕聲伎屢有明徵延
壽又誣其乘雕文舸摘芙蓉姬人蕩舟淹沒爲
其致疾之由果爾則昭明故一少年浮蕩者殊
與半生行徑不類姚察之贊昭明也曰雞鳴而
起孳孳爲善此是何等人品一經延壽蛇足便
便存沒銜疾然則南史昭明傳爲有梁東朝謗

昭明太子集

附錄

廿四

書可也

遺事

昭明太子愛文學士嘗遊宴玄圃執王筠袖撫
劉孝綽背曰所謂左把浮丘袖右抱洪崖肩

昭明太子好士愛文劉孝綽殷芸陸倕王筠等

同見賓禮太子文章繁富群才咸欲撰錄太子

使孝綽集而序之

劉孝綽傳

武帝時忽有四人來貌可七十鵲衣蹑履入建

康里惟昭明識之一見如故目爲四公子

太平廣記

昭明太子業廨守器譽貞問寢居肅成而講藝

關博望以招賢舉中葉之詞林酌前脩之筆海
周巡繇嶠品盈尺之珍楚望長瀾比徑寸之寶
故撰斯集名曰文選後進英髦咸資準的

李善

序

集評

昭明太子稟仁聖之姿縱生知之量明月西流
幼有文章之敏羽籥東序長備元良之德蘊茲
三善弘此四聰虎賁愿其經學智囊慙其調護
豈止博望延賓壽春能賦問疑棗攄書戒憑陵
而已哉

簡文
帝表

糾謬

世人見梁太子輒指爲昭明不知昭明沒後簡
文亦爲皇太子也以故二太子多混襍未易可
辨如林下作妓詩昭明筆也玉臺乃誤標爲簡
文和林下妓應令卽簡文應昭明令也初學乃
誤標爲昭明夫昭明將應誰令乎今兩正之他
如和名士悅傾城同庾肩吾四詠俱簡文筆而
藝文誤書爲昭明又如江南弄及新燕俱簡文
筆而英華誤書爲昭明若曉春詩諸本並稱簡

文乃近代綜昭明集亦冒載可恨今悉正之
王威明卒太子出臨與湘東王令乃尺牘清裁
及世說新語補遂誤指太子爲昭明昭明以中
大通三年薨至六年始改元大同而王規以大
同二年卒則太子者正簡文也是時昭明薨凡
六年矣今正之

陶華陽墓誌藝文類聚載爲簡文作近乃誤列于
昭明集卽焦太史所刻陶隱居附錄亦不及駁
正殆相沿之過也按弘景亦大同二年始卒其

非昭明手無疑且中稱昔在枌壤今遙元良則

簡文始在南徐州後爲太子也今正之

近刻小本昭明

集并簡文所爲何徵君墓誌亦復混收今俱駁歸簡文集

文苑英華有七召一篇是梁人語然不載作者姓名而列在昭明七契之後文儷遂并七召冒爲昭明作今駁出